

559.759 sinadura

ACCIÓ CULTURAL del País Valenciá ak aurtengo urtarrilean Mugarik Gabe-ko Telebistaren aldeko kanpaina hasi zuen. Valentziarrek arazoak dituzte Kataluniako telebista katalanak ikusteko eta Gobernuak, aukera babestu baino, hesiak jarri ditu azkenaldian. Katalan hiztunek bezala, euskara eta galiziera hiztunek ere arazo berak izaten dituztenez, kanpaina gehiago zabaldu zuten. Sinadurak eskatu zituzten hizkuntza gutxietan emititzen duten telebista publikoak nonahi ikus ahal izateko lege proiektua proposatzeko. Espainiako Hauteskunde Erroldaren bulegoak 559.759 sinadu-

ra onartu ditu eta beraz, Acció Cultural elkarteak lege proiektua onar dadin lanean hasiko da.

EEPri oniritzia

BARNE, Kultura eta Hezkuntza Ministerioen izenean etorri dira Frantziako ikuskariak, eta Euskararen Erakunde Publikoaren sei urteko ibilbidea ontzat jo dute. Ikuskariek Gobernuari beste sei urtez EEPren jarduna luzatzeko eskatu diote eta erakundearen egituratzea, hizkuntza politikaren hezurdura, garatutako ildoak eta elkarkidetzak eredu goraipatu dituzte.

BAHEA

Juanjo Olasagarrek *Diario de Noticiasen*: “Nekagarria egiten zaidana da Nafarroan euskalduna izateak dakarren aire pobrea. Jon [Arretxe] eta biok Nafarroan ez gara inor ere. EAEn bizi bagina, egoera pixka bat ezberdina izan litzateke. (...) Badakigu Nafarroako Gobernuaren lehen tasun bat dela euskara desagerraraztea, inongo lotsarik gabe. Neurri batean horrekin bizitzen ikasi dugu. Ezin gaitzke egunero haserretu, burugorrorak izan behar dugu, nafarrak horretarako onak zarete, eta geure hizkuntzari eutsi behar diogu Nafarroan ere”.

Jon Arretxek: “Aldi berean EAEko irakurleentzat Iparraldekoa edo Nafarroakoa izateak balio erantsia izan dezake. Gehiago lagundu behar dizutela ikus dezakete edo puntu exotikoa izan dezake batzuentzat”.

Itziar Hormaza ingeles irakasleak *Berrian* esandakoak:

Kazetariaren galdera: Badago sumoa hirugarren hizkuntza batean kontzentratzeak euskara are gehiago bazter dezakeela. Zure ustez, zein ekarpen egin diezaioke, eta zein kalte?

I. Hormaza: “Nik ez dut inolako kalterik ikusten. Hizkuntzek ez diote elkarri lekua kentzen, gehigarriak dira. Gure kasuan gertatzen dena da, gure hizkuntza minoritarioa eta gutxitua denez, oso kontuz ibili behar dela proiektu linguistikoak garatzerakoan. Are gehiago, horretarako eskualde bakoitza aztertu beharko litzateke, eta proiektu oso pertsonalizatuak diseinatu, eskola, auzo eta herri bakoitzaren premiei erantzuteko eginak. Beti izan behar dugu kontuan erdaren presentzia handia dela eta geurea dela hizkuntza gutxitua”.



Honelako albisteak egunero irakurtzeko, jaso hari@DOAN e-postaz: www.argaia.com/harpidetza_haria.php

TALAIAN**Kosta ahala kosta**

Espainiako Gobernuak finantza eta ekonomia krisiaren aurrean duen jarreraz nahi dena esan liteke. Baina inork ezingo du esan krisiaren kontrako bere politikak “elektoralistak” direnik. Boterea galtzea ekar dakioke. Berak jadanik esan du: “Krisia gainditzeko erreformak eta neurriak aurrera eramango ditut kosta ahala kosta”. Aldiz, oposizioan dauden eskuineko gainerako alderdiak –batez ere PP, CIU eta EAJ– dira “politika elektoralistak” egiten ari direnak. Izan ere, Zapateroren krisiaren kontrako erreforma berdina ez, drastikoagoak eta okerragoak jarriko litzateke. Kontua da, hauteskundearen aurrean, eskuineko alderdiei hobe datorkiola langileen, pentsionisten, funtzionario publikoen eta langabetuen “ordezkari” itxurak egitea. Zapatero leiala izaten ari da orain finantza merkatuekin, prezio bat exigitzen baitiote Espainiako Estatuko zor subiranoari. Eskuineko oposizioa oraindik eta leialagoa eta konplizeagoa izango litzateke merkatu horiekin! Nolako hipokrisia eta fariseismoa espainiar, katalan eta euskal eskuinarena!

Zapaterok alderdi sozialdemokrata ordezkatzeko du eta bere printzipio ideologikoei traizioa egin die, finantza merkatuekin hain leial izanik. Muturrera eraman du bere “kosta ahala kosta”. Zeren eta, har zitzakeen neurri ez hain grabatzaileak langile eta herri sektoreentzat eta gogorragoak enpresari eta bankarientzat. Oraingoan, krisiaren ondorioak langileen eta herri sektoreen bizkar baino ez ditu utzi. Zain gaude ea zer egiten duen aberatsenentzako zergekin, ea egungo krisiaren zama banatzen duen. Eta batez ere, ea zer egiten duen paradisu fiskalak desagerrarazteko, estutzen gaituen zorra konpon dezaketean Espainiako Estatuko eta Euskal Herriko dirutza ugari atsedean hartzen baitu haietan. Krisia gehiago kosta dakiela gehiago dutenei!

Juan Mari Arregi